



**PRIJEDLOG ZAKONA**  
**O PRAZNICIMA BOSNE I HERCEGOVINE**

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na \_\_. sjednici Predstavničkog doma, održanoj \_\_\_\_\_ 2010. godine, i na \_\_. sjednici Doma naroda, održanoj \_\_\_\_\_ 2010. godine, usvojila je

## Z A K O N O PRAZNICIMA BOSNE I HERCEGOVINE

### POGLAVLJE I. (OPĆE ODREDBE)

#### Član 1. (Predmet)

Zakonom o praznicima Bosne i Hercegovine (u daljnjem tekstu: Zakon) određuju se dani praznika Bosne i Hercegovine, vjerski praznici, način njihovog obilježavanja i praznovanja od strane građana Bosne i Hercegovine, svih državnih organa i institucija u Bosni i Hercegovini, te organizacija i institucija, preduzeća i drugih oblika organiziranja za obavljanje djelatnosti i pružanje usluga na cijeloj teritoriji Bosne i Hercegovine.

#### Član 2. (Definicije)

U smislu ovog zakona:

- a) „Državni praznik“ je dan koji se po gregorijanskom kalendaru obilježava i praznuje na teritoriji cijele Bosne i Hercegovine;
- b) „Vjerski praznik“ je dan koji se po gregorijanskom, julijanskom, hidžretskom, hebrejskom ili drugom kalendaru određuje kao vjerski praznik, slava ili svetkovina, te ga obilježavaju i praznuju lica koja su pripadnici tih vjerskih zajednica.

### POGLAVLJE II. (DRŽAVNI PRAZNICI BOSNE I HERCEGOVINE)

#### Član 3. (Državni praznici Bosne i Hercegovine)

Državni praznici Bosne i Hercegovine su:

- a) Nova godina;
- b) Dan nezavisnosti BiH;
- c) Međunarodni praznik rada;
- d) Dan pobjede nad fašizmom i Dan Evrope;
- e) Dan pristupanja BiH u članstvo Organizacije ujedinjenih naroda;
- f) Dan sjećanja na žrtve genocida u Srebrenici i svih ratova;
- g) Dan ustanka protiv fašizma u BiH;
- h) Dan državnosti BiH.

Državni praznici Bosne i Hercegovine su neradni dani.

Član 4.  
(Nova godina)

„Nova godina“ slavi se 1. i 2. januara.  
Ako Nova godina pada u nedjelju, neradni dan bit će prvi naredni radni dan.

Član 5.  
(Dan nezavisnosti BiH)

„Dan nezavisnosti BiH“ slavi se 1. marta.  
Ako Dan nezavisnosti BiH pada u nedjelju, neradni dan bit će prvi naredni radni dan.

Član 6.  
(Međunarodni praznik rada)

„Međunarodni praznik rada“ slavi se 1. i 2. maja.  
Ako Međunarodni praznik rada pada u nedjelju, neradni dan bit će prvi naredni radni dan.

Član 7.  
(Dan pobjede nad fašizmom i Dan Evrope)

„Dan pobjede nad fašizmom i Dan Evrope“ slavi se 9. maja.

Član 8.  
(Dan pristupanja BiH u članstvo Organizacije ujedinjenih naroda)

„Dan pristupanja BiH u članstvo Organizacije ujedinjenih naroda“ slavi se 21. maja.

Član 9.  
(Dan sjećanja na žrtve genocida u Srebrenici i svih ratova)

„Dan sjećanja na žrtve genocida u Srebrenici i svih ratova“ obilježava se 11. jula.  
Ako Dan sjećanja na žrtve genocida u Srebrenici i svih ratova pada u nedjelju, neradni dan bit će prvi naredni radni dan.

Član 10.  
(Dan ustanka protiv fašizma u BiH)

„Dan ustanka protiv fašizma u BiH“ slavi se 27. jula.

Član 11.  
(Dan državnosti BiH)

„Dan državnosti BiH“ slavi se 25. novembra.  
Ako Dan državnosti BiH pada u nedjelju, neradni dan bit će prvi naredni radni dan.  
POGLAVLJE III. (VJERSKI PRAZNICI)

Član 12.  
(Neradni dani zaposlenih u vrijeme vjerskih praznika)

(1) Neradni dani u Bosni i Hercegovini određuju se i za vrijeme vjerskih praznika kako slijedi:

a) za pripadnike islamske vjeroispovijesti: po dva dana za Kurban- bajram i Ramazanski bajram, te jedan dan za Hidžretsku godinu (Nova godina);

b) za pripadnike katoličke vjeroispovijesti: 6. januar – Bogojavljenje, jedan dan za Tijelovo, 15. august – Uznesenje Blažene Djevice Marije ili Velika Gospa, 1. novembar – Svi Sveti i 25. decembar – Božić;

c) za pripadnike pravoslavne vjeroispovijesti: jedan dan za Božić, jedan dan za Svetog prvomučenika i arhiđakona Stefana, jedan dan za Duhove, jedan dan za Bogojavljenje i jedan dan za Svetog Savu;

d) za pripadnike jevrejske vjeroispovijesti: dva dana za Pesah, jedan dan za Jom Kipur (Dan pomirenja), jedan dan za Jom Hašoa (Dan holokausta) i jedan dan za Roš Hašana (Nova godina).

(2) Ako neki od dana utvrđenih u stavu (1) ovog člana pada u nedjelju, neradni dan bit će i prvi naredni radni dan.

Član 13.  
(Naknada plaća zaposlenih)

U neradne dane utvrđene čl. 3., 4., 5., 6., 7., 8., 9., 10., 11. i 12. ovog zakona zaposleni imaju pravo na naknadu plaće kao da rade.

Član 14.  
(Neradni dani državnih organa i drugih institucija,  
privrednih društava i drugih pravnih lica)

Ako priroda djelatnosti, odnosno tehnologije procesa rada zahtijeva neprekidan rad, Vijeće ministara BiH može odrediti koji su državni organi i druge institucije, privredna društva i druga pravna lica dužna raditi i u kojem obimu u dane praznika utvrđenih ovim zakonom.

Član 15.  
(Obilježavanje praznika Bosne i Hercegovine)

Obilježavanje praznika Bosne i Hercegovine utvrđenih članom 3. ovog zakona vrši se javnim isticanjem simbola Bosne i Hercegovine u skladu sa zakonom.

POGLAVLJE IV. (PRIJELAZNE I ZAVRŠNE ODREDBE)

Član 16.  
(Prestanak primjene drugih propisa)

Danom stupanja na snagu ovog zakona prestaju se primjenjivati svi zakoni i drugi propisi na

teritoriji Bosne i Hercegovine koji nisu u saglasnosti s odredbama ovog zakona.

Član 17.  
(Usaglašavanja propisa)

Svi subjekti na nižim nivoima državne organizacije obavezni su uskladiti svoje propise s ovim zakonom u roku od 90 dana od dana stupanja na snagu ovog zakona.

Član 18.  
(Stupanje na snagu)

Ovaj zakon stupa na snagu osmog dana od dana objavljivanja u „Službenom glasniku BiH“.

PSBiH, broj \_\_\_\_\_ / \_\_\_\_\_

\_\_\_\_\_  
Sarajevo

Predsjedavajući  
Predstavničkog doma  
Parlamentarne skupštine BiH  
dr. Milorad Živković

Predsjedavajući  
Doma naroda  
Parlamentarne skupštine BiH  
Sulejman Tihić

## O B R A Z L O Ž E N J E

### I. USTAVNI OSNOV

Ustavni osnov za donošenje Zakona o praznicima Bosne i Hercegovine sadržan je u odredbi člana IV 4. a) Ustava BiH, u skladu s kojim je Parlamentarna skupština BiH nadležna za „Donošenje zakona potrebnih za provođenje odluka Predsjedništva ili za izvršavanje nadležnosti Skupštine po ovom ustavu“.

Ustavni osnov sadržan je i u odredbi člana I 1. Ustava BiH, prema kojem „Republika Bosna i Hercegovine, čije je zvanično ime od sada Bosna i Hercegovina nastavlja svoje pravno postojanje po međunarodnom pravu kao država...“.

U prethodnom stavu citirana odredba Ustava BiH pruža mogućnost Bosni i Hercegovini, pored ostalog, da uredi i pitanje praznika koji će se slaviti i obilježavati na cijeloj teritoriji države Bosne i Hercegovine.

Uređivanje pitanja obilježavanja praznika, posebno onih državnog karaktera, predstavlja jedno od obilježja državnosti i suvereniteta svake države.

## II. RAZLOZI ZA DONOŠENJE

Ustavom BiH (član 1.) je, između ostalog, propisano da Bosna i Hercegovina „nastavlja svoje pravno postojanje po međunarodnom pravu kao država, s unutrašnjom strukturom modificiranom ovim ustavom i s postojećim međunarodno priznatim granicama“. Također, u prijelaznim odredbama Ustava BiH (Anex II.) navedeno je da svi zakoni, propisi i sudski poslovnici, koji su na snazi na teritoriji Bosne i Hercegovine, u trenutku kada Ustav stupi na snagu, ostaju na snazi u onoj mjeri u kojoj nisu u suprotnosti sa Ustavom dok drugačije ne odredi nadležni organ vlasti Bosne i Hercegovine.

U skladu s ovim ustavnim odredbama i savremenim potrebama države Bosne i Hercegovine nužno je pristupiti dogradnji zakonskih odredbi kojima se regulira pitanje praznika u Bosni i Hercegovini. U prilog ovoj konstataciji ide i zaključak Predsjedništva BiH koji je usvojen na 59. sjednici, održanoj 6.10.1999., a koji govori o potrebi pristupanja donošenju novog Zakona o praznicima Bosne i Hercegovine. Nažalost, rečeni zaključak u proteklih devet, odnosno deset godina nikada nije realiziran.

Polazeći od toga da građani i narodi u Bosni i Hercegovini, u skladu sa svojom religijskom pripadnosti i tradiciji, obilježavaju različite praznike, potrebno je državnim zakonom priznati navedene različitosti. Državni praznici su neradni za sve građane, državne organe i institucije, a vjerski praznici su neradni za vjernike prema njihovoj vlastitoj odluci i opredjeljenju.

Sve navedeno predstavlja razloge koji govore o potrebi donošenja Zakona o praznicima Bosne i Hercegovine.

## III. OBRAZLOŽENJE RJEŠENJA

Zakon se sastoji od četiri sljedeća poglavlja:

U prvom poglavlju naznačava se sadržaj zakona, preciziraju subjekti na koje se odnose odredbe ovog zakona i definiraju pojmovi važni za razumijevanje teksta.

U drugom poglavlju određeni su praznici Bosne i Hercegovine, koji se obilježavaju kao neradni dani na cijeloj teritoriji Bosne i Hercegovine. Precizirani su datumi njihovog obilježavanja i način obilježavanja.

Treće poglavlje regulira vjerske praznike na način da kao vjerske praznike definira sve dane koji su po gregorijanskom, julijanskom, hidžretskom, hebrejskom ili drugom kalendaru određeni kao vjerski praznici, slave ili svetkovine, te ih obilježavaju i praznuju lica koja su pripadnici tih vjerskih zajednica.

U četvrtom poglavlju precizirano je da danom stupanja na snagu ovog zakona prestaju važiti svi propisi koji nisu u saglasnosti s njim, te je utvrđen rok u kojem su nadležni subjekti dužni svoje propise usaglasiti s ovim zakonom i preciziran datum stupanja na snagu Zakona.

## IV. FINANSIJSKA SREDSTVA ZA PROVOĐENJE PROPISA

Za provođenje ovog zakona nisu potrebna dodatna finansijska sredstva.